











SERINISSIMO PRINCIPI  
**CAROLO D. D. DE ROHAN SOUBISE,**  
 DUCI ROHANNÆO, PARI AC POLEMARCHO FRANCIÆ,  
 EQUITUM PRÆTORIANORUM PRÆFECTO,  
 BELGII ET HANNONIÆ PROREGI,  
 GALLICORUM EXERCITUM IN GERMANIA IMPERATORI, &c  
 Voyet offert & consecrat obsequentissimus FRANCISCUS  
 SAUTEREAU.

---

**DE FRACTURA CRANII**  
**QUÆ DICITUR CONTRAFISSURA.**

---

**THESES ANATOMICO-CHIRURGICÆ.**

**S**OLUTIO continui quæ fit in aliquâ Cranii parte, à puncto percussione alienâ, Græcè ἀπὸ ξένου, Latine *contrafissura*, Gallicè *contre-coup* vocatur. Quæ fracturæ species etsi Antiquis non ignota (a) à recentioribus tamen nonnullis tanquam impossibilis rejecta est, quibus si fortè sese offerbant vulnerati, quorum calva antè collisa, postè frangeretur,

(a) Hippocrates eam cognovit de capit. vuln. Celsus, p. 515.

A



statim supponebatur eos per quoddam animi deliquium, in latus vulneri adversum immemores cecidisse, unde nova percussio & tandem fractura. Nunc verò, cum Observatoribus non defuerint casus in quibus hoc morbi genus supra dicto modo explicari non potuerit, unica ferè de illo remanet Practicis sententia; & de ipsius detegendi atque curandi ratione potiùs sollicitantur, quàm de possibilitate discutiendâ. Hanc insuper fracturam tanta sequuntur aut etiam plerumque stipant accidentia, adeò difficile dignoscuntur ejus existentia & situs, tam urgentibus & accommodatis eget medelis, ità denique incertæ sunt & obscuræ circa hanc Authorum sententiæ, ut mirum videri non debeat Academiam Chirurgicam Parisiensem ejus theoriam & tractandi rationem pro materie Præmii annualis selegerit ac proposuerit (a). Quidquid ergo ad tam gravem doctrinæ artis curandi partem spectat, non potest quin sit maximi momenti; verùm, quia non sinunt Theseos limites, nobis satis sit si solummodò species communiores, causas & modum quo generantur ejusmodi fracturæ, signa minùs obscura, modum denique curandi à peritissimis hucusque usitatum, quàm accuratiùs & clariùs fieri poterit indagemus atque referamus præmissis obiter quibusdam necessariis Anatomix Cranii notionibus.

OSSA octo variis donata densitate, figurâ, magnitudine & crassitie capsam hanc informant solidam & ferè ovalem quæ secretoria spirituum organa continet, & ab impressionibus corporum externorum defendit ac tuetur. Sua cuique inest conformatio peculiaris variis adimplendis apta muniis. Sed illud est omnibus cranii ossibus commune, quod duabus singula tabulis consistit quarum altera interna est, externa altera. Has interjacet substantia cellularis, ossea, diploë seu meditullium nuncupata cujus fibræ ità disponuntur ut vacuola relinquunt non pauca subrubro quodam gelatinosoque irrigata succo; in ossibus medulla vocatur. Quod autem huc maximè conducit animadvertendum in eo situm est, ut ossium variæ densitati crassitieque, & singulari quo secum invicem uniuntur modo attendatur.

COMMITTUNTUR ossa calvariæ *suturis propriis* secum, *communibus* cum faciei ossibus. De his silemus. Per *coronalem* os coronale cum parietalibus, temporalibus & sphænoideis alis; per *sagittalem* parietalia inter se; per *lambdoïdeam* occipitis os cum parietalibus & temporalibus; per *squamosam* cum parietalibus, occipite & alis sphænoideis temporalia conjunguntur. Hæc articulationis specie adeò firmantur ossa, ut in ætate provectâ partes conjunctas non contiguas, sed potiùs continuas crederes, ità ut vix concipi possit quomodo tam solidæ cavitatis parietes ictu vel gravi frangi queant. Miserrimo



tamen, neque admodum raro fato accidit, ut incusso calvariæ ictu validiore, ipsa hæc ossa valentia findantur, disrumpantur, undè periculosissima exsurgant accidentia, ipsaque mors accersatur. Hoc igitur non adeò mirabile ac antea videbitur, si quot & quàm infensi miserorum mortalium vitæ insidientur hostes, & ad heterogeneam capitis crassitiem, quæ non eadem esse debuit, animum attenderis.

DEBILIORA calvariæ loca sunt imprimis quatuor cavitates occipitis, ubi lobi cerebri posteriores & cerebellum hospitantur, media pars laminæ squamosæ ossis petrosi, & alæ majores Ingrassiæ, in quibus medii cerebri lobi recubant; anteriores & inferiores parietalium anguli, illæ coronalis partes quæ laminam orbitæ superiorem efficiunt, & cribrosa ethmoidis lamina, quibus incumbunt cerebri lobi anteriores. Valentiora sunt os coronale, & media occipitis pars, ubi adest crucialis eminentia, ossis petrosi totiusque calvariæ basis quam constituunt sphænoïdes & processus basilaris, loca futurarum.

Atque juniores longè flexiliora sunt omnia corporis ideòque ipsius calvariæ ossa. Longè majori succi quantitate abundant, partesque nondum eam motûs & pressionis actionem expertæ sunt, quæ deinceps duriores & solidiores faciendæ sunt. Non attamen medullaris ille quo ossa capitis copiosius in junioribus, parcius in adultioribus & perpetim usque alluuntur imbuunturque, succus obliterit quin non nisi finitâ flexilitate & elasticitate fruuntur, adeò ut partes ipsorum elementares ad certum duntaxat gradum distrahi se patiantur, ultra quem si protendatur nisus, brevissimo temporis tractu discessuræ sint & continui solutio præsto futura sit.

Ex his unâ concurrentibus exsurgit pixis illa sphæroïdea que partim frangibilis, partim elastica easdem, ubi collidetur, simul sequetur leges quibus singulatim subjacent corpora elastica & frangibilia, quando percutiantur.

CONTRAFISSURÆ distinguuntur à loco affecto, à figurâ, magnitudine & accidentibus. 1°. Vel in eodem osse contrafissura in eâ parte accidet quæ supra, aut infra, dextrorsum, aut sinistrorsum est à loco ad quem adactus est impetus, atque in eodem casu, aut interna tantum, aut externa tantum, aut utraque simul infringetur ossis tabulæ. 2°. Vel colliso aliquo osse, ipsoque post acceptum impetum integro remanente, os aliud priori, ut plerumque accidit, diametraliter oppositum disrumpetur, in eoque casu una, aut altera, aut ambæ tabulæ diffingentur. 3°. Vel os effractum non opponetur ictui directæ, sed quolibet aliò, in ipsâ calvariæ basi, collocabitur, tuncque sicut



aliis, eadem adesse poterunt differentia. 4°. Potest esse contrasiffura transversa, longitudinalis, angularis, incurva, &c. 5°. Potest esse magna, parva, mediocris, &c. 6°. Calamitatem hanc comitari aut subsequi possunt accidentia quàm plurima, sicuti cerebri, cerebellique commotiones, duræ meningis abcessiones, cujuscumque humoris congestiones, &c. hinc totidem genera contrasiffurarum.

Ut cæterarum cranii fracturarum, sic contrasiffurarum causæ omnes externæ sunt, à corporibus duris oriendæ. Ut autem locum habeat contrasiffura necesse est, 1°. Ut corpus collidens mole sit cum capitis mole proportionatâ, hujus conditionis defectu glans plumbea tenuior, localem tantummodo parit effectum, id est, non longè ultrâ locum immediatè affectum protenditur. 2°. Ea debet esse corporis caput collidentis aut à capite collisi superficies, ut nullâ præcellente asperitate promineat quæ sola sic impetum faciat, ut locus concussus ante dividatur, quàm contrasiffura potuerit accidere. Hinc acinaces, licet mole sint idoneâ, nullam generant contrasiffuram, nullam instrumenta pungentia. 3°. Debet corpus collidens vel collisum eam habere densitatem quæ non reactioni capitis cedat, alioquin potius accideret commotio cerebri quàm contrasiffura. Sic fœni fasciculus potest quidem enecare, nunquam verò contrasiffuram producere. At si corpus durum superficiei levigatæ & molis sufficientis in caput irruat, aut caput illi impingat, juxta motûs communicati leges, impressio dividitur omnibus generatim capitis partibus; unde fit ut singulæ in motum impulsæ, secundum determinationes alternatim amicas & oppositas à se invicem recedere enitantur. Quod si nîsus ille minor sit, statim à cerebro, cute & partibus vicinis à cranio diversis absorbetur. Verùm si major sit quàm ut contraniti possit fibrarum ossæarum cohæsiō, solvetur illa & fractura accidet in illâ parte, ubi major fuerit ad amotionem tendentia, & minor cohæsiō. Quæ quidem ut clariùs intelligantur, notanda sunt sequentia.

NOTUM est ex Mechanicis, 1°. Corpus elasticum & sphæricum percuti non posse in aliquo puncto, quin statim partes omnes in diametro percussâ positæ accedant ad centrum, dum aliæ partes in diametro huic perpendiculari ab eodem centro recedunt; qui effectus instantaneus est, & durat tandiù quandiù corporibus collidentibus superest motus communicandus. In secundo enim instanti, per vim elasticitatis, partes ad pristinum statum redeunt, & quia elasticitas *vis est acceleratrix*, res in illo statu permanere nequeunt. Partes in pristinum statum reditæ pergunt à centro recedere, donec annihilentur acquisiti velocitatis acceleratæ gradus. Interea partes diametraliter oppositæ, primo instanti à centro recessæ, suâ vice eodem



5

mechanismo ad centrum accedunt, adeò ut corpus illud sphaericum & elasticum mutet suam figuram in ellipsoïdalem cujus diametri sibi perpendiculares fiunt alternatim majores & minores axes. Has oscillationes fore perennes demonstrant Geometræ, si elasticitas esset perfecta & nulla obstarèt à corporibus ambientibus resistentia. 2°. Motum semper communicari habità ratione molis, & in corporibus ità dividi, ut nulla sit pars quæ non motus habeat quantitatem suæ moli peculiari proportionatam. 3°. Physica docet corpora dura & elasticitate expertia ut plurimum esse frangibilia, & supradictis oscillationibus suscipiendis atque sustinendis imparia; unde fit ut instanti percussione frangantur in eâ parte, ubi minor est cohæsiō. 4°. Denique corpora elastica partim & frangibilia sequi debere leges utriusque classis corporum combinatas & à se invicem temperatas.

His positis, quoniam ex dictis cranium nobis suppeditat corpus elasticitate quâdam donatum, quamvis tegumentis involvatur & substantiâ molli cerebri repleatur, si percussum supponatur à corporibus qualia requisivimus, aut in illa impingat, non potest quin quantum in se erit oscillationes dictas moliatur & exerceat. Sed aliundè quia demonstratur frangibile simul & elasticum, si tanta sit collisionis summa, quæ oscillationes producat ampliores quàm ut ipsis resistere possit partium cranii adhæsiō, fiet solutio in parte debiliore.

QUEMADMODUM omnium ferè capitis fissurarum, ità, à fortiori, contrafissurarum diagnosi ardua maximè & difficillima est. Accidentia quæ hanc comitantur nihil præter cerebri commotionem indicant, aut quamdam vasorum disruptionem fluidorumque extravasationem. Dolores capitis vehementes, vomitus, vertigines, capitis debilitas, auriumque tinnitus, ipse etiam per nares aures-vè cruoris effluxus; sensus loquelæ & rationis intercessio non multum adjuvant, sicut & torpor, somnusque continuus. Neque mediocriter difficultatem auget situs detegendus. Musculorum insertiones aliquam semper asperitatem in osse fingunt, ideòque male suadæ. Morfu non strepent unquam ossa quæ non franguntur, sed finduntur tantum. Atramentum scriptorium & abrasiones cognitam supponunt contrafissuræ sedem; futurarum vicinia Hippocratem ipsum fefellit. Quonam ergò vertet se Chirurgus? Consecutiva accidentia morbum dilucidius declarant, at ferius quandoque, morsque jam capiti vulnerato imminet, cum medela tentatur. Nil temerè moliendum est; neque citius, neque ferius incidenda tegumenta sunt. *Ad tertium septimum-vè aut undecimum à vulnere diem (ratione scilicet tempestatis) expectandum esse* monet nos Hippocrates (a). Suadet Celsus (b) eadem: *Melius est,*

(a) De cap. vuln. p. 305.

(b) De calvaria fracta, p. 517.



inquit, (*quæ ad ferramenta venire*) ante emplastra experiri quæ calvariarum causâ componuntur. Nec injuriâ uterque; cum etenim nihil ferè certi habeamus à primitivis accidentibus, elapsis diebus illis, modo non aucta sint symptomata, sperari potest, teste Ruischio, fore ut os fractum fissum-vè, si quod fuerit, solius ope naturæ coeat iterùm.

Ut veterum hæc de contrassurarum diagnosi theoria certior haberi possit, sequentia addenda non abs re futurum autumamus. 1°. Debet Chirurgus ita capitis ossium tenere anatomen, ut singula calvariarum loca minùs munita quasi præ oculis assiduò habeat; at præsertim ad os ictui oppositum mentem advertat. Talis enim noticia illius mentem dirigere, suspicionemque primùm, ac deinde probabilitatem, imò ipsam quandoque certitudinem parere poterit. 2°. Debet ad ictus vehementiam maximoperè, ætatemque vulnerati atque temperiem attendere. 3°. Accidentia primitiva quàm sedulò perpendere. 4°. Tandem, si graviter aliquis percussus sit, si mala indicia subsequantur, neque eâ parte, quâ cutis discissa aut contusa est, rima reperitur, dicimus non solum non incommotum esse, cum Celso (a), sed etiam necessarium esse asserimus parte alterâ considerare num quis locus mollior sit & tumeat eumque aperire, si quidem ibi fissum os reperietur.

NEQUE verò minùs cautè sese gerere debet Chirurgus in prognosi ferendâ. Etiam si enim solutis omnibus difficultatibus tandem pateat resonantia, non idcirco tota apparet hujusce morbi gravitas. Latet aliquoties insensus hostis, & inopinata subitò exsurgunt accidentia quæ ægrum tollunt de medio, eo præcisè instanti, quo spes salutis proxima affulgebat. Desperatos quandoque ægros naturæ industriosæ conamen ingruenti letho eripit. Chirurgus ergo in promittendâ salute, aut præfagiendâ morte non negligenter circumspiciat. Cæterùm sunt quædam regulæ generales quibus nonnunquam satis firmiter inniti poterit. Morbus hic generatim nunquam levis haberi debet; præter enim accidentia sibi propria, ut sunt fibrarum ossæarum & vasorum, diploës, meningum, ruptura, liquidi ossei aut cruenti effusio, &c. habet insuper accidentia omnia commotionis aut compressionis cerebri semper inevitabilis. Ingravescit etiam pro loco & magnitudine accidentium. Quæ parietalia, occiput & coronale afficit contrassura, propter loci incidendi, retegendi, minorem difficultatem, minùs quoque, cæteris paribus, periculosa est & faciliùs sanatur. Quæ ossa temporalia in parte debiliore, periculosior evadit propter crotaphites musculos; quæ denique in basi cranii sit, semper lethalis habenda est propter ipsam loci detegendi & medelæ impos-



sibilitatem. Majores periculosiores sunt minoribus. Si enim aliquando eas secundum totam dimensionem detegeret Chirurgus, dimidiam cranii periferiæ partem denudare cogeretur, inde eveniret hæmorrhagia, alteratio totius ossium partis aëri expositæ, suppurationes majores, &c. Patet denique eo graviores fore contrasissuras & periculosiores quò graviora has stipabunt accidentia, ac præsertim quæ cum hæmorrhagiâ accident sive suprâ, sive infrâ meninges effluat, intrâ breve tempus lethales censendæ sunt, nisi statim terebratione eliminetur liquidum congestum. Idem ferè accidit si quodam fragmento lædantur membranæ & cerebrum; apparent citò delirium, convulsiones præsertim in parte cui distribuitur nervus cujus origo pungitur aut comprimitur, horrores, &c. quæ symptomata mors brevi sequitur, nisi mediis idoneis extrahantur corpora illa à quibus procreantur.

**DETECTA** contrasissurâ mediis quæ suprâ recensuimus; nil se offert in curatione quod referri non possit ad curationem cæterarum cranii fracturarum. 1°. Enim accidentibus primitivis utpotè sæpè sæpius originem à commotione aut compressione cerebri ducentibus medetur remediis huic accommodatis. Largæ celebrantur sanguinis missiones tum è brachio, tum è pede cautè tamen attendendo ad peritissimam M. BERTRANDI doctrinam, à celeberrimo M. ANDOUILLE in Actibus Regiæ Academiæ Chirurgicæ multis Observationibus firmatam (a). Evacuante non parùm profunt, imprimis emetica. Si nihilominus insistant accidentia hæc, etiamsi contrasissura minor esset, ad terebrationem deveniendum est, ad explorandum scilicet num quædam fragmenta tabulæ internæ in cerebrum penetrantia aut sanguinis aliqua collectio hæc omnia producant symptomata. Quod si perforato cranio, dura mater colore mutata tumentem sese offerat, cruciatim incidenda est, tuncque respirationis suspensione, tussi, sternutatione excitatâ, abdominis contractione cruor aut liquor quilibet effusus foras pellitur; quo facto, more assueto curatur & deligatur vulnus.

QUOD si prædicta symptomata non adsint, nec admodum protendatur contrasissura, cum Ruifchio expectari potest numquid natura aliquid moliatur ad ossium glutinationem. Accidentia enim quæ ex ac hac cunctatione oriri possent, si à solâ fissurâ pendeant, non adeò urgent, quin adhuc ipsi mederi queat. Verùm interim ritè perpendat Chirurgus numquid aut effusionem lentam, aut proximam ossium putredinem aliamque affectionem prælagiat; in hoc enim casu periculum foret in morâ. Meminerit tandem semper *in rebus*.

(a) Acta Regiæ Chirurg. Acad. pag. 506.



*dubiis partem tutiorem esse eligendam & terebrationem non admodum gravia generare symptomata, si sola spectetur, ægrotosque ferè nullos perire, nisi quia operatio accidentia tollere non potuit.*

*Angoulême* Has Theses, DEO DUCE, & Præside M. FRANCISCO-  
GUILLELMO LEVACHER, Artium Liberalium &  
Chirurgiæ Magistro, tueri conabitur FRANCISCUS SAUTEREAU,  
Ingulifmas Artium Magister in Universitate Parisiensi.

PARISIIS,  
IN REGIIS CHIRURGORUM SCHOLIS;  
Die Sabbati 17<sup>a</sup> Aprilis à sesqui-secundâ post meridiem ad  
septimam. Anno R. S. H. 1762.

PRO ACTU PUBLICO  
ET MAGISTERII LAUREA.